



*Selasa, 13 Agustus 2024*  
**Ogen: Kuan-kuanen 10:21**



**"Erguna Man Sienterem"**



**G**una ndatken pemeteh ntah ku ja deba kalak lawes erlajar. Tapi situhuna pelajaran e i ja pa pe banci sidatken, termasuk pe i sekelewetta. Pernah nge mentas i bas ukurta engkai maka batang tualah banci meganjang kal? Janah engkai maka mbue kal gunana tualah e, mulai batangna, bulungna, tualahna jine? Ras kai nge ertina si enda kerina? Arah sada batang sinuan-sinuan enda pe mbue kal kepe banci kita ndatken kesadaren si mbaru si erbahanca kita jadi kalak si pentar.

Kitab Kuan-kuanen itulis gelah ise pe si mpelajari buku enda jadi kalak si pentar dengen dem alu kuasa gelah erguna i bas kegeluhenna. Kepentaren banci maba kemalemen ate subuk man dirina jine bage pe man jelma si enterem. Kepentaren si sejati labo terjeng ngeteh, ngangkai ras ngasup erbahan si mehuli, ntah si mejile, tapi kepentaren si tahu-tuhu e pe erkawiten ras kinibeluhenta nggejabken makna kehadirenta i doni, bage pe nggenepi sura-sura Tuhan e alu tepat i bas geluhta. Ki Hajar Dewantara, tokoh pendidiken Nasional pernah ngerana nina, **"Apapun yang dilakukan oleh seseorang itu, hendaknya dapat bermanfaat bagi dirinya sendiri, bermanfaat bagi bangsanya dan bermanfaat bagi dunia pada umumnya."**

Kalak si pentar tapi kinibeluhenna terjeng memuaskan hasrat dirina, kepentarena e semu. Kalak si pentar tapi kepentarena gelah ia ipujiken jelma si enterem, kedungenna latihan nge akapna, nukah bosan/medu. Kepentaren e, seimbang antara pribadi, bage pe ku darat dirina. Bagi batang tualah ndai. Seiring batangna turah ku datas, uratna pe reh bagesna ku teruh. E maka adi kenca ia nggo gedang, meter reh angina, la ia nukah mbulak. Kenca ia meganjang reh erbuah, sikap ingan cio-cio, banci ka minem lau mumbang, segar iakapna. Bagelah perturah kepentaren i bas dirinta, reh bagesna kita rurat i bas Tuhan, reh paguhna kita turah mereken ulih man si enterem.